

## DOMINGU XXI TEMPU KOMÚN – TINAN C

### Tema

Liturjia domingu ne'e nian propoin mai ita tema "salvasaun" nian. Asesu ba "Reinu" – ba vida nakonu, ba ksolok totál (salvasaun) – mak don ida Maromak oferese ba mane no fetu hotu, laho esesaun; maibe' atu to'o iha ne'ebá, presiza hakribi moris ida foti-an nian, egoísta, auto-suficiente, prepotente, no tuir Jezús iha dalan domin nian, saran-an nian, don moris nian. Iha *primeira leitura*, profeta ida la identifika sé loos, propoin mai ita vizaun ida comunidade eskatolójika" nian, comunidade universál, ne'ebé povu raiklaran tomak iha asesu. Jentiu sira rasik simu bolun atu fó sasin Liafoun Di'ak Maromak nian no simu konvite atu serví Maromak, laho diskriminasaun ida bazeia ba rasa, etnia eh orijen.

Iha *Evanjellu*, Jezús – konfronta ho pergunta ida kona-ba número ema sira ne'ebé hetan salvasaun – nia sujere katak festa han-hemu iha "Reinu" oferese ba ema hotu; maski nune'e laiha billete rezervadu eh entrada garantida: presiza halo opsaun atu liu husi "odamatan klood" no aseita tuir Jezús hodi saran an iha domin totál ba maluk sira.

*Leitura daruak* aborda ho forma oinseluk asuntu "odamatan klood": fiar-na'in ne'ebé loos enfrenta ho aten-barani terus no provasaun sira, haree sinál sira Maromak nia domin nian, ne'ebé eduka, korrije, hatudu mai ita oinsá opsaun ruma ita halo la iha sentidu no prepara ita ba moris foun "Reinu" nian.

### LEITURA I – Is 66,18-21

Kapítulu 56-66 livru Isaías nian (koñesidu nu'udar "Trito-Isaías") iha autór oioin ne'ebé sei iha ligasaun espirituál ho Deutero-Isaías. Ita la hatene buat ida kona-ba autór sira-ne'e. Buat ne'ebé ita hatene mak sira apresenta sira-nia mensajen iha sékulu XIV nia rohan no iha sékulu XV mK nia inísiu (kontestu pos-ezília nian).

Iha reinu antigu Judá nian, iha tempu ne'e, moris grupu oioin: judeu fila-hikas husi ezília, judeu ne'ebé la bá ezília, ema estranjeiru sira ne'ebé mai hela iha Jerusalém durante ezília nu'udar servisu-na'in sira. Problema hasoru estranjeiru sira ne'ebé barak ba beibeik mak, oinsá integra sira iha Maromak nia Povu. La'ós kestaun fasil ida, comunidade ne'ebé foin fila husi ezília hetan ameasa internu (sira ne'ebé la bá ezília no la komprende laran-manas relijiozu ne'ebé sira foin fila husi ezília iha), no inimigu esternu (liuliu samaritanu sira), iha tendénsia atu taka an. Esdras no Neemias –líder boot sira faze ne'e nian – favorese polítika xenófoba, hodi bandu kazamentu mistu (kf. Esd 9-10; Ne 13,23-27).

Testu sira Trito-Isaías nian aborda problema estranjeiru sira-nian no, tanba iha testu oioin autór la hanesan, iha mós atitute lahanesan kona-ba ne'e, hahú husi apelu atu halakon nasaun sala-na'in sira (kf. Is 63,3-6; 64,1; 66,15-16), to'o admisaun estranjeiru sira-nian iha Maromak nia Povu. Ita-nia testu nia kontestu mak ida universalista, nakloke no tolerante ba povu seluk.

### MENSAJEN

Autór testu ne'e nian konsidera katak nasaun sira simu bolun atu integra an iha Maromak nia Povu. Iha perspetiva ne'e mak nia kompoin karákte eskatolójiku mundu foun nian ne'ebé

testu apresenta: iha mundu foun ne'ebé atu mai, Maromak bolu ema hotu atu integra iha Maromak nia Povu.

Eskema apresenta etapa oioin: uluk liu, Maromak mai atu hahú prosesu reuniaun nasaun sira-nian (vers. 18); hafoin, sei fó sinál ida no haruka misionáriu sira (hili entre povu estranjeiru sira), atu haklaken Na'i nia glória – maski nasaun dook liu (vers. 19); hafoin, nasaun sira sei hatán ba sinál Na'i nian no dirije ba foho santu Jerusalém nian (Jerusalém, iha teolojia judaika, mak mundu nia “husar”, fatin Maromak horik bá iha nia Povu nia leet no iha ne'ebé sei hala'o salvasaun definitiva), hodi lori nu'udar karan ba Na'i israelita sira namkari lemo rai (vers. 20); finalmente, Na'i sei hili entre sira ne'ebé to'o (judeu sira fila husi Diáspora no jentiu sira ne'ebé rona Na'i nia konvite atu integra iha comunidade salvasaun nian) amlulik no levita sira atu serví Nia (vers. 21).

## **LEITURA II – Heb 12,5-7.11-13**

Ita fila fali ba Surat ba Ebreu sira. Testu ne'ebé ohin propoin mai ita kontinuasaun domingu kotuk nian. Autór halo apelu ba konstánsia no perseveransa iha fiar. Surat ne'e haruka ba comunidade ida (eh grupu comunidade nian) ne'ebé lakon estuziazmu insiál no paradu iha fiar maten, kómuda no lahó ejizénsia boboot; comunidade ne'e hahú sofre persegisaun no iha perigu atu hewai sira-nia fiar. Ne'e mak kontestu ba apelu ne'ebé testu apresenta mai ita ohin.

### *MENSAJEN*

Konvida tiha fiar-na'in sira atu haka'as an, hanesan atleta sira, nune'e to'o ba vitória, tuir Kristu nia ezemplu (kf. Heb 12,1-4), autór husu sarani sira atu aseita korresaun no reprensaun husi Maromak, hanesan hahalok pedagójiku Aman ida-nian ne'ebé preokupa ho oan sira nia ksolok.

Asuntu fundamentál mak sentidu terus nian no prova sira ne'ebé fiar-na'in sira tenke suporta (persegisaun no inkomprensaun sira). Mentalidade populár konsidera terus nu'udar Maromak nia kastigu ba ema nia salan (kf. Jo 9,1-3); maibé, ba autór Surat ba Ebreu sira, terus la'ós kastigu, maibé ai-morik ida, pedagogia ida, ne'ebé Maromak uza atu halo ita sai tasak no hanorin ita moris. Maromak uza meu sira ne'e atu hatudu ita-nia hahalok sira ne'ebé la iha sentidu; nune'e, Nia hatudu ninia atensaun Aman nian. Terus mak prova kona-ba ita-nia kondisaun nu'udar “Maromak nia oan sira”.

Aleinde hatudu Maromak nia domin, prova sira halo ita sai di'ak liután, kanfilak ita, lori ita atu muda ita-nia moris. Liuhusi transformasaun ne'e, habiit ita interiormente atu simu Maromak nia santidade. Nune'e, mak ita tenke konsidera terus sira, bainhira sira to'o mai, nu'udar parte projetu salvasaun Maromak nian mai ita, maklorik dame no salvasaun nian... No tenke lori ita ba agradesimentu.

Iha konkluzoan, hodi foti Is 35,3 autór konvida atu konfia no manán ta'uk.

## **EVANJELLU – Lc 13,22-30**

Epizódiu Evanjellu ohin nian fó hanoin mai ita katak ita kontinua iha “dalan ba Jerusalém”. “Viajen” ne'e atu hatudu ba eskolante sira karakterístika fiar-na'in auténtiku nian no hatudu “dalan ba Reinu”.

Lc 13,22-30 mak konjuntu testu husi proveniénsia lahanesan, no tau hamutuk iha-ne'e tanba ninia interse temátiku. Tema mak entrada iha “Reinu” (Mateus apresenta liafuan hanesan iha

kontestu lahanesan – kf. Lc 13,23-24 no Mt 7,13-14; Lc 13,25 no Mt 25,10-12; Lc 13,26-27 no Mt 7,22-23; Lc 13,28-29 no Mt 8,12; Lc 13,30 no Mt 19,30). Lucas aproveita atu hatudu diferença entre teolojia judeu sira nian no Jezús nian, kona-ba salvasaun.

### *MENSAJEN*

Kestaun ba katekeze ohin nian mak: “Na’i, ema uitoan de’it mak hetan salvasaun?”

Kestaun ne’e mak sai debate iha ambiente rabíniku barak. Ba farizeu sira iha Jezús nia tempu, “salvasaun” mak realidade ida rezerva de’it ba Povu eleitu no ba nia de’it; maibé, iha sírkulu apokalíptiku sira, domina vizaun pesimista no hateten katak ema uitoan de’it mak hetan salvasaun. Jezús fali haklaken kona-ba Aman laran-luak, ne’ebé simu ema hotu, liuliu sira ne’ebé kiak no fraku.

Jezús la hatán direktamente ba pergunta. Ba Nia, liufali ko’alia kona-ba número konkretu, importante mak define kondisaun sira atu pertense ba “Reinu” no estimula eskolante sira atu halo desizaun ba “Reinu”. Iha Jezús nia ótika, tama iha Reinu mak uluknanai tama husi “odamatan klood” (vers. 24). Ilas “odamatan klood” ne’e signifika renúnsia ba naha sira ne’ebé “habokur” ema no impede atu moris iha lójika “Reinu” nian. Naha sá de’it? Nu’udar ezemplu bele dehan naha egoísmu nian, foti-an nian, rikusoin nian, ambisaun nian, kaan ba podér no domínio... Buat hotu ne’ebé impede atu ema moris iha lójika servisu nian, saran-an nian, domin nian, partilla nian, don moris nian, impede adezaun ba “Reinu”.

Atu esplisita di’ak liután hanorin kona-ba entrada iha “Reinu”, Lucas tau iha Jezús nia ibun ai-kanoik ida. “Reinu” mak festa han-hemu ida ne’ebé ema sira Na’i hili nanis sei tuur hamutuk ho patriarka no profeta sira (vers. 25-29). Sé mak sei tuur iha meza “Reinu” nian mak sira hotu ne’ebé simu eh aseita Jezús nia konvite salvasaun nian no adere ba Ninia projetu hodi moris iha saran an, domin no serví maluk sira... Laiha kritériu bazeia ba rasa, jeografia, etnia ne’ebé impede ema ida atu tama iha festa “Reinu” nian: buat ne’ebé desizivu mak adezaun ba Jezús. Ba sira ne’ebé la aseita Jezús nia proposta sira la tama iha festa “Reinu” nian, maski sira konsidera an santu liu ka pertense ba Povu eleitu institucionalmente. Iha ne’e evidente katak Jezús ko’alia ba Judeu sira no sujere ba sira katak la’ós tanba sira pertense ba Israel sira nia entrada iha “Reinu” aseguira ona; ai-kanoik mós aplika ba “eskolante” sira ne’ebé lakohi hasai husi sira foti-an, egoísmu, atu tuir Jezús nia dalan, dalan domin no saran an nian.